


BUKOLWESHI BWAPWIJIIKA

 Najinga nobe kechi nayuka kyakwambapo lukeelo luno ne. Amiwa najikwikala kunyuma kookwa na Mulongo Egan, kabiji Najikumvwa... Mulongo Neville wajikwambangapo kintu kimo, akwe na kutala kwi amiwa. Kabiji Najikwamba kwi Mulongo Egan, “Bushe aye ubena kungita amiwa nyi?”

Kabiji aye wajikwamba mba, “Byo aji.”

² Kabiji pano Amiwa njikuno nakwaambapo kintu kimo lukeelo luno. Najikulangulukanga, byo Najinga... Awa fani kokwa, kobaji... ukoka jiwi, kimwekatu nobe utwala jiwi pangye, inge ubena kwamba. Kimweka nobe fani utwala jiwi kungi.

Amiwa najikumvwanga bingi... lushimuno byo Najinga kokwa na kulombelela mwanamukazhi pa foni. Kabiji ne yewa wakutambula mbila, naji kulubako kubikapo mpuzha ya kutuminapo, kufuma ku bakazhi bakwa Dr. Morrison. Kabiji Amiwa nsakwimubula kyo Nauba, pa milombelo yenu yonse, kabiji ne yami. Natetekelepo maboko pa foni, kabiji ne kusota kuji nambala, konse ko yajinga, kabiji ne kwipuzha Mupashi Wazhila amba aaye ku mwanamukazhi. Nanchi Nalanguluka mba Aye wakonsha kumvwa kyokya nobe byonka byo Afwainwa kwikala inge twakonsha... Mwamona? Kabiji Amiwa na kwikibikatu panshi. Kabiji kyafwainwa kwikala aja jo jishinda Nkambo mo ekikebela. Mwamona? Kyafwainwa kwikala nobe kyawama byonkabya.

³ Kabiji pano Najikumvwa lushimuno kimye kyo Najinga kookwa, pa muntu umo ke aambe amba Nyenga Rook wajinga na... Naketekela Mulongo Neville waambile mba uji na—na kikola kya kulubakana milanguluko, nobe byonkabyo. Twayai tukwachijile Lesa pa kyokyo, anweba vulukaitu kikyeye kintu kimo: Lesa wayuka Banji Mwine. Aye wibayuka bonse.

⁴ Mwakonsha kung’umvwatu bulongo kunyuma nyi? Inge kechi wakonsha ne, kuji bipona byabulamo bantu kuno. Wafwainwa kupipula inge wakeba kuuba byo byo. Kabiji, twayai tumone, bushe *kikyeye* kyo kine kyakwambilamo? [Mulongo waamba mba, “Ine, mwane.”—Waku.] Akye *kukwe* kyo kine kyakwambilamo nyi? Kiji bulongo. Twakonsha kumona kana mwafwainwa kubwela pepi. Pano ibyepi ngapapo, Gene? Akyo kisakwikalatu bulongo. Kabiji Amiwa kimye kimo jiwi jiyooyoma; Amiwa nabasapwilenga pa kimye kyabayako. Bushe akyo kyawama nyi? Mwakonsha kumvwa bulongo nyi?

⁵ Kabiji kine twavuluka mu iye milombelo. Kabiji twakeba kupana nsawakya wa mbung’eno yawama bingi ikekala ku...

Bushe Mbena kutala pa Nyenga Rook? Nakulanguluka nobe Mbena kutala pa inetu kunyuma kukwe wamweka nobe aye. Najikulanguluka mba, “Kine Amiwa kechi mbena kwamba kubiji kuno ne.” Amiwa mbena kutala pa muntu umo wamweka nobe iye, kubwela na kunyuma. Uji mu Kipatela kya Wazhila Edward.

⁶ Kabiji nanchi, ku Cleveland, Tennessee, kabiji ne mu California, twajinga na mbung’eno yawama bingi. Aye Nkambo wapesheshe pakatampe, kabiji ne bintu byavula byo Aubile. Kabiji tuji na lusekelo pa kyokyo. Twasekela twabwela ku jibumba jetu, ko tubena kupana sawakya pa buwame ne lusa lwa Lesa. Abyo byobyoyo baubile mu Baibolo.

⁷ Nakusachilanga Mulongo Neville, nangwa pa milombelo yakwa Mulongo Beeler, byo alombejilenga bantu, kabiji—kabiji ne kwipuzha bukwashe ne lusa. kabiji inge twakonsha kumona kulutwe, kimye kyonse, bintu byonse byubiwa, mukatana kuuba mba pajipo kintu kyakine pabibye. Kabiji pano Mulongo Neville byo aishile ne kuleta babo bakwashe, kabiji ne bakwobotu, kuno ku pulatifomu, pa—pa kwamba pa mapesho a kwa Lesa pa—pa bupe bwa kipwilo, Namumvwine kwamba mu milombelo yanji kwi Lesa, pa boba banabalume, byo belombelela umo ne mukwabo. Kabiji kyokyo kyawama bingi pa kumvwa kafunga wakonsha kulombelela bakwashe baji, kabiji ne ba kwasho nabo balombelela ba kafunga. Inge mwamona kipwilo kuya mu lumvwang’ano byobyoy, kyawama, kintu kimo kibena kukebewa kubiwa. Abyo kipwilo byo kyafwainwa kwikala mu ndonda. Kabiji nkipa mulanguluko wa kibaaba. Nakufwainwa kwamba pa mapesho a pa Kandeshi, kabiji ne pa kukana kuteleka ku sawakya wa baendejile ntanda, bino pano Amiwa napipula milanguluko yami, ku kintu kikwabo.

⁸ Kabiji pano, na mambo a lubuko, Amiwa njina lushimuno luchechetu lo Nafwainwa kupana. Najinga na luketekelo lwa kumona nsongwalume wami, Billy, kunyuma kokwa, bino uji nakyo mu pokochi wanji.

Kabiji Billy ubena kwikala bulongo mu mbung’eno, kukila byo aubanga. Wajinga wa lubazhi bazhi, walubakana, kabiji wakonsha kubuula bantu mba, “Oo, yanga kekale! yanga kekale!” Kwaamba mba, “Amiwa nsakwimupa kitupa kyamilombelo.” Bino Namona, katataka, kuji bantu mu mbung’eno abo bo omvwina bingi lusa. Inge kechi uji na bitupa byamilombelo byashalapo ne, nanchi aye ukebabika mu luumu pakuuba mba Nebalombelela.

⁹ Kabiji akyo kintu kyamwekele ku Chicago, kimye kyapeleleko. Kabiji Nakonsha kutanga yoya kalata inge watwela mukachi. Amiwa kechi na mumwene ne. Aye kechi wayukile mba Mbena kwiya lukeelo luno, kuno ne, kabiji—kabiji nakeba—nakeba kalata. Bino Nekilangulukiletu byo

Nalangulukilenga pa misongo yavula. Kabiji abino byo byobiji. Ke kalata yaswishiwa kuuba mba . . .

Natangilenga mu pepala wa byambo, (Amiwa kechi; nabujilwe ne) apo mapepala a byambo po ajimbulwilenga Oral Roerts, na mambo a kulombelela mwanamukazhi ao wajinga na kikola kya zala ne kufwa wafwile. Kabiji Ami, pano, nobe mwina America, Na—Natemwa kuteleka ku mizhilo ne—ne ku muntu uji muluusa. Bino Nalanguluka mba akyo kechi byokiji ne. Nakumya kana bakonsha kuswa kubika, mu mapepala, bonse Oral Roberts bo alombelela ne kubukwa, abo madokotala bo bakakelwe. Nakumya, be bipipulatu kimye kimo, mwamona. Kechi bakonsha kuuba kyokyo ne. Kabiji pano Nalanguluka mba kape diabola wibalubakanyatu, kyakuuba mba, kabiji ne Lesa wikiswisha, pakuuba mba Juba ja Kinje bakazhatwe pa kyokyo. Bino Nayuka masauzande a bantu abo Oral Roberts bo alombelela, babena kufwa, kabiji bakosatu bulongo.

¹⁰ Nanchi, mwamona, abo, baji nalufyengo pa kyokyo. Bakapana lubaji lwabo, lubaji lwakujimbulula, bino kechi bakonsha kupana lubaji lukwabo ne. Bino, papela wa byambo wafwainwa kuyukisha bantu bintu-bijipo-bibena kumweka. Nanchi Nalanguluka mba, inge bantu batakoto muchima ku umu ne mukwabo, inge muntu umu watambula lubuko, kine wabukwa, pepala yense wabyambo mu United States wafwainwa kubikamo sawakya wa kyokyo. Pakuuba kechi mwakonsha kwibateula mba bekyube ne. Ine. Anweba mwatwala kokwa kintu kiji byobya, bakemwendeleka ne kuseka pa kyokyo, ne kwikibwezha. Bino pano inge pajipo kintu kimo kya kujimbulula . . . Kiyatu na kumwesa amba kino kyaalo kyanengezhiwa luzhachisho. Ibyo. Kabiji kwafwainwa kwikala luzhachisho, kabiji kechi kujipo jishinda ja kunyemenamo ne. Kabiji babena kwilumbika makala a mujilo pa mitwe yabo, kabiji ne bikwabotu. Kabiji akyo ke—ke . . . kubula kukwatakana, na mwaila bishinakata! Pepala wa byambo, bishinakata byakyo, ke ku—ke ku bulang'ana byonse byatama nangwa byawama, bibena kumweka. Bino bafumako ku bishinakata byabo. Kabiji umvwe bafumako ku bishinakata byabo, nanchi abo—abo kechi bakonsha kwingila bulongo mwayila kyo baimenapo ne.

¹¹ Kabiji abyo byokiji pamo na kipwilo. Inge kipwilo kyafuma kubishinakata byakyo, kechi kyakonsha kwingijila bazhijikwa bulongo ne. Twafwainwa kwikala pamo, twafwainwa kwikala bakwatakana. Twafwainwa kwikala ba muchima umu ne kuyila mumo. Inge ne, atweba kechi tukengijila Lesa nangwa bantu ne, kana twaikala ba muchima umu kabiji bakuyila mumo, kwimana ku bishinakata bya mu Baibolo kabiji ne bintu Lesa byo aamba mba biji bulongo. Twafwainwa kimye kyonse kwimana kulubaji lwabo.

¹² Billy waikela mu kibamba, ku Chicago, aye . . . Muntu umu

waishile kwi aye, mwanamukazhi na mulume wanji, bajinga na kaasa ku mapwapwa, bafwilenga. Kabiji mukazhi wanji wajinga na kikola kya polyo mu kipona kya mawilo, kabiji ne aye waesekelenga kulamawizha mwanamulume ubula kwimana, na kaasa ku jipwapwa. Kabiji Billy wamwambijile mba, waambile mba, “Ami—Amiwa ndekelaiko mambo, mwane.” Waambile mba, “Nakonsha kutemwa kwimupa kitupa kya milombelo.” Kabiji aye waambile mba, “Bino Amiwa—Amiwa kechi njipo na kikwabo kyashalapo ne.”

¹³ Kabiji aye waambile mba, “Kyawama, kijitu bulongo, mwaana wamulume.” Aye waambile mba, “Akyo kijitu bulongo.” Waambile mba, “Twakweseka kufikako, bino kitukosela bingi atweba.”

¹⁴ Billy waambile mba, “Nsakwimubula byo mukoba.” Waambile mba, “Amiwa sakusenda bataata. Kabiji Amiwa nsakwibaleta, kabiji Nsakwibalupulamo.” Kabiji waambile mba, “Inge Nauba byobyoy, akumumvwatu Mbila yanji,” waambile mba, “nanchi mwatambula kyenu . . . nangwa bakazhi benu ne anweba, kabiji ne kutwela mu kibamba kicheche konka ko Nsakuya, kabiji Nsakwibambila bemulombebele.”

¹⁵ “Oo,” waambile mba, “akyo kya mushingi, mwaana. Akyo kyakila kuwama.” Mwamona? Kuji—kuji byubilo. Mwamona? “Kyawama bingi. Akyo kyawama.” Mwamona?

¹⁶ Kabiji abwa bufuku, Billy, byo abwelele kunyuma kokwa, wajingatu nakyo kyo aambile, mba uji na bukwe-yanji-wamulume kokwa ubena kulasa mashi kufuma ku mapwapwa. Kabiji ne ba bukwe-yanji-babakazhi kokwa, wafuminenga mashi munda, wajinga na bilonda munda, kabiji watwelele nabo mukachi, kajajinga nobe kwibakwasha amba batwele. Mwafwainwa kutajisha bulongo, luumu yense wakonsha kuyula, mwamona. Bino kupita ne kwibalombelela, twatambwile kalata, kufuma pa melu, amba awa mwanamulume wabukwatu bulongo kuyewa kaasa wa mapwapwa. Awa mwanamukazhi, mukazhi wajinga mu kipona kya mawilo, waimana, ubena kwendaukatu bulongo. Awa mwanamulume walashilenga mashi kufuma mu—mu mapwapwa, ntimbi, wabukwatu bulongo. Kabiji ne mukazhi wanji wabukwa ku bilonda bya munda. Foolo ba mwi abo babukilwe, ponkapotu! Nakumya kana mapepala a byambo akonsha kuswa kunemba byobyoy. Mwamona? Mwamona? Mwamona? Oo! Bino Lesa ukijitu Lesa. Aye ubatu bintu mu jishinda Janji Mwine, mwayukatu, kabiji Aye wawama bingi. Tuji bingi na lusekelo pa kuyuka mba Aye ye Lesa.

¹⁷ Twaambilenga lukeelo lumo pa musapwishi mucheche ye twayuka, ao wazhokolokanga, na kulombelela bakolwa ne bintutu byonse. Kabiji waile na kulombelela muntu wajinga mu kipatela ku Louisville, wajinga na lukatazho lwa mapwapwa, inetu wafwile. Awe mulongo mucheche waambile

mba, “Kyawama, kechi kikebewa ne. . . Lesa kechi uji. . . Kechi kujipo Lesa ne. Aye wakonsha kulama Kyaambo Kyanji.” Waambile mba, “Amiwa na mushingiletu pamotu nobe—nobe byaamba Baibolo. Inge wabula kulama Kyaambo Kyanji, Aye kechi ye Lesa ne.” Waambile mba, “Ke buukutu.”

¹⁸ Bino, akyo kyakonsha kumweka byobyo kanatu wamuyuka Lesa. Alo lubaji lumo lwa Binembelo, bino kechi kyonse Kinembelo ne. Kijitu pa lwitabilo lwa muntu bunke bwanji. Mwamona?

¹⁹ Kabiji Nabujile bakazhi bami, Naambile mba, “Kuji bintu byavula bingi bimweka, byo Nayuka mba kobiji. Amiwa kechi nayuka kikamwenkela amiwa kumpelo ne. Nakonsha kuya mu musangotu umo. Inge Lesa wakonsha kufumyapo kuboko Kwanji kwa lusa pe amiwa, Amiwa nakonsha kuya mujishindatu jimo. Pakuuba kikulutu Aye walama kuboko Kwanji kwa lusa ne lutangijilo pe amiwa, Amiwa nkatwajijilatu nakuya.” Bino Naipwizhe Meda, Naambile mba, “Wajinga ng’anyi mu kibamba alwa lukeelo panyuma ya kimonwa kya kumona awa nsongwakazhi wami mucheche, Sharon?”

²⁰ Mwaila jishinda, juba jikwabo, Najinga nobe wapungila. Naikela pa mukwakwa. Kabiji mwayuka jishimikila jami ja kimonwa kyanji, panyuma. Kabiji Natajile, kwiya ku lubaji lwami, kabiji kwaishilenga nsongwakazhi mwanyike mu mukwakwa konka kuno ku Jeffersonville, wajingatatu pamo nobe kyokya kimonwa. Nekwachiletu maboko ami pamo. Kyamwekeletu pamo nobe kimonwa kya kwa Sharon wamu cheche! Aye wajinga mwanamukazhi mwanyike pa kyokya kimye.

²¹ Kabiji panyuma ya kyokya kimwesho alwa lukeelo, mu Lukumo, Amiwa. . . Hope wambujilenga mba, wambikile kuboko kwanji pa kipuzhi, kwaamba mba, “Kusakamana ne atweba ne, Bill. Atweba tuji bingi bulongo.” Amiwa nakebelenga kwikujika. Kabiji aye waambile mba, “Kechi wikale wasakamana ne. Ndaye amba kechi ukasakamana jikwabo ne.”

²² Kabiji Naambile mba, “Amiwa kuuba nalaya ne, Hope, mambo Ami—Ami—Amiwa. . . Nsakamana. Amiwa kechi nakonsha kwikikwasha ne.”

²³ Kabiji Nafumine mu kimwesho, kasa naimana mu kibamba kya mfishi. Kabiji pano kechi kimwesho ne, kechi kyakutwelelamo ne, bino kuboko kwanji kwakijingatatu kwankikwata. Kabiji wapuminenga pa kipuzhi. Nalangulukile mba, “Pembelaikotu mineti umo. Akye kechi. . .” Amiwa kechi nayukile mwakwakitongwela mu oa moba ne, kimwesho. Nekitelele mba kukupukilwa mutulo. Naambile mba, “Akye ke. . . Kuboko kwanji kwakijinga ponka.” Naambile mba, “Obewa ukiji muno, Hope?”

²⁴ Aye waambile mba, “Bill, ndaye mba kechi ukasakamana jikwabo pe amiwa ne Sharon ne.” Mambo, Najinga kumpelo ya lwendo. Najinga winengezha kwikujika.

Naambile mba, “Amiwa nakulaya.” Kabiji aye wankumbachile, ne nkupapasha na kuboko kwanji.

Kabiji pano Na—Naambile mba, “Hope, uji kwepi?” Najinga na . . . ne kyumvwine, poso byo Nakwachile mubanga muheche mu kyeya kabiji na mundosele. Napitang’ene kuzhokoloka, nakebele kebele mu bipona byonse, na kumona kana waikele momwa.

Aye ye Lesa. Aye ukijitu Lesa byo ajinga, ne leelo, nobe byonka byo Ajinga pa Mutumba Wakwalulwa kimye Mosesa ne Elaija kyo amwekele. Aye ukijitu Lesa.

²⁵ Twakonsha kupita mu makatazho avula ne meseko. Bino vulukai, kuji Muntu umo Ao wayuka, usamisha kyeya mujishinda, wikilengela kwikala kintutulu. Amiwa kechi nayuka biji kunyuma ya kipembe ne. Bino Nayuka kintu kimo, Amiwa mbena kukanamina kikokwanyi kya kiyukilo kya lwito lwa mwiulu, pajuba pajuba, na kweseka kwikela ku kyokya kintu kikatampe kikamweka juba jimo byo Nkamumona Aye, kilungi ne kilungi, ne kubulang’ana jishimikila, “Napulukila konka ku lusa.” Ajo jo juba jo Ngikelako. Nakusha abya bintu lunyuma, bijiko, Nakeba kuya kulutwe, kutwajijilatu na kuya.

²⁶ Nakeba ino tabbanako, pano byo mwaimana, Nakeba mba anweba mutwajijiletu na kukanamina kiyukilo kya lwito lwa mwiulu. Kyonse kyo mwakonsha kuuba, ikwatai pamo, mwikaletu nobe byafwainwa kwikala kisemi kimo, bino kimye kyonse na kubuko kwalupulwa, na kukanamina kukwatapo muntu umo, amba mwibalete mukachi. Pakuuba lulwe Lwitabilo lo tubena kusapwilapo ne kukwachijila na kulwila, kechi mwafwainwa kufumako na ichi Kwialo ne. Mambo, inge mwaketekela amiwa kwikala kalume Wanji, alwe lo lunengezho lwa Lesa. Kechi kikekala mu bavula ne. Kimye kyonse kikekalatu mu bacheche, kimye kyonse byo kyajinga kabiji byo kikekala. Bino, vulukai, kyanembwa mba, “Kuchina ne, kajitanga kacheche; kyo kyaswa muchima wa Shenu kwimupa Bufumu.”

²⁷ Bino, kuji jibumba ja maofweshi a kipwilo kyetu, madikoni, matulasiti, mukulumpe wa sukuulu wa Pamulungu, bakafunga, nobe kipwilo kyentu byo kyabikwa mu ndonda. Kabiji ne anweba, bantu mwasajile baabo ba mu maofweshi kabiji ne yuwe kafunga. Amiwa ne mukulumpe utala pa byonse, na kwikimona mba kibena kwendatu bulongo, kabiji ne kupana bukwasho kabiji ne bintutu bikwabo. Anweba yenu musala kafunga wenu, anweba musala matulasiti, anweba musala madikoni benu, anweba musala ofweshi uji yense mu kino kipwilo; anweba, bantu. Kabiji ke mwingilo wenu kwimana

ku lubaji lwa baabo banabalume, monai, mambo bonse booba bilubo. Abo ke bantu. Abo ke bantutu, kabiji booba bilubo. Pakuuba inge Ndamakyaalo wa United States wauba kilubo, bushe tumufumyapo, pa bu Ndamakyaalo? Tulubakotu pa kyokyo ne kuya kulutwe. Ajo jo jishinda jo tukebelamo kipwilo kyetu kuuba pa kino kimye. Amiwa najikumuteleka kulombelela, mamineti acheche apita, booba madikoni. Kabiji ne kumvwa kunyuma kokwa, lushimuno, pa kibelo, kufuma ku batulasiti, byo mwaikala na muchima umo. Pano ikalai muyekao musango. Kabiji, anweba bamembala imanai ku lubaji lwa matulasiti, bakwasho, kabiji ne kafunga. Kabiji vulukai, inge mwakwatakana bibye pamo, vulukai mba ke mwingilo wakwa diabola wa kumona mba mwapalang'enamo. Pano byo kikala kimye kyonse kabiji byo kikekala kulutwe. Bino anweba imanai ku lubaji lwa bamaofweshi enu, kabiji ako kwajinga kwamba Nkonaji kukebanga kwamba.

²⁸ Kabiji Amiwa njina bimo bikwabo...bintu bimo bya kulamika pa bochi lukeelo luno, pa mbung'eno ya bije ne luusa lwabo. Kabiji bikalamikwa pa bbodi wa masawakya. Kabiji Amiwa njina kikope kya kwa Mulongo Reberson, ao uji wa kumupando wa ba di...wa matulasiti. Kabiji pano Amiwa njina kipepala kya Mulongo Collins, byo Nalanguluka, ao uji nobe wa kumupando wa kije kya bakwasho. Kabiji pano, onse o maofweshi abikwako mwaila Kinembelo, kabiji bafwainwa kwikala na mizhilo ya mu Binembelo byo bafwainwa kuuba. Onkao mambo, matulasiti aji na ofweshi wabo bene. Kabiji bakwasho nabo baji na ofweshi wabo bene. Awa mukulumpe wa sukuulu wa Pamulungu uji na ofweshi wanji mwine. Kabiji kafunga ye mutwe wa jitanga.

²⁹ Bino, uji yense mu ao uji na bintu bipashako. Kabiji Nalanguluka mba kupwila kwenu kechi kwafwainwa kwikalako pa kimye kimo ne, bino kyafwainwa kwikalatu nobe kila ofweshi, mambo bakwasho kechi bajipo na kintu kimo kya kwamba ku batulasiti ne kanatu baji na mwingilo wakupana kwi abo. Kabiji ne kwikyalulwila kulubaji lukwaabo, matulasiti batala pa mali kabiji ne pa kishimikwa; kafwako kyo baji nakyo kya kuuba na bakwasho ne. Bakwasho ke bakapokola ba kipwilo, kabiji bo balondela panyuma yakwa kafunga. Kabiji tulasiti ye kalama wa bipe byonse. Batulasiti kechi bajipo na kya kuuba na lubaji lwa bumupashi ne, kabiji dikoni kechi ujipo na kya kuuba na lubaji lwa bya bumali ne. Onkao mambo, byo kyafwainwa kwikala. Kabiji mukulumpe wa sukuulu wa Pamulungu utala pa sukuulu wa Pamulungu. Nanchi Nji nabyo byonse byanembwa, bya pulitwa, pakuuba mba bilamikwe pa bbodi wa masawakya.

³⁰ Kabiji tukabika ne apo, mu fulemu, Lufunjisho lwaimenapo kipwilo, kabiji ne Kwilubika mufulemu muno, mu kipwilo; byo twaimenapo, bi—bishinakata, Lufunjisho lwa kipwilo. Pano, pa

kuuba mba twikale kipwilo, twafwainwa kwikala na lufunjisho.

³¹ Atweba kechi tupachika ne, ne kwamba mba, “Atweba *tufikatu* papo.” Atweba tuyatu palepa bingi, na lumvwang’ano lwa bupopweshi na bantu bonse, kyakuuba mba Lesa uketuleka kuya, mu Binembelo Byanji, na bantu. Kabiji pano kwatakanai pamo, ikalaitu ba kuyila mumo, muchima umo, kabiji kwendela pamo na mambo akwa Lesa. Ajo jo jishinda Lesa jo etukebelamo mba tube.

Pano twayai tulombe, kabiji ne kuzhikula Kyambo.

³² Anweba Nkambo wawama, pano tuji pepi na Kyambo kya Bulesa, nangwa kutanga kwa kikyeye Kyambo. Lekai Mupashi Wenu Wazhila alumbulule kwi atweba abya byo twakabila. Kabiji lekai twambe, Nkambo, kabiji ne kwikala na bumi, kasa twayuka mba atweba bonse twi baana Benu, konka ku lusa, monka mo mwitwichila Anweba. Lekai mwikale lumvwang’ano lwa bupopweshi mu kino kipwilo, byo twamona mba tujitu pepi kwikala mu lwendo lwabaya, twalangukuka, kuleta bamwingilo bakwabo kuya mu mwingilo kuntu kumo, inge Anweba mwakonsha nkutuma mu byaalo bikwabo byapusanapusana bya panopantanda, kuya kokwa na kutatula lulwe Lwitabilo, kabiji ne kwikala na wamwingilo waswa ne kwinengezha, kabiji wafunjishiwa kwingila yewa mwingilo. Kabiji lekai alwa Lwitabilo lwapainwe kala ku bazhikwa, alo lotwaimenapo na kuchichika, lwaikala ke kizhingu kuzhokoloka ntanda yonse. Kiswishai kye, Nkambo. Lekai yuwe mulumba mucheche wa seku, nobe byo kyajinga juba jimo kimye kyo twikipaine kwi Anweba, lekai kukemane kipwilo kuno, Nkambo, kyakuuba mba kufuma mwi akyo mukekale bamwingilo ne basapwishi ne bafunjishi kabiji ne bamishonale, kuya mu mankooka onse a panopantanda.

³³ Twakonsha kwipuzha, lukeelo luno, mapesho apusanako akwa Mulongo wetu ne Nyenga Stricker babena kumanama pa kino kimye. Bino twayuka kuuba mba atweba bonse tubikwa mu kukwe kwesekwa. Mwaana yense wiya kwi Lesa wafwainwa kufundwa, ne kwesekwa. Kabiji umvwe twalekelako bukiji, ne kwaluluka, nanchi twi baana babula bashabo, kabiji kechi baana bakwa Lesa ne. Panai kwi Mulongo ne Nyenga Stricker ngovu ne bulume, bekale ku kifulo kyabo kyamwingilo. Inge basaka kulomba kajo ka kuja, lekai kuboko Kwenu kwa mapesho kwikale pe abo. Mambo kechi twayuka ne bino kyakonsha kwikala kupichila mu bulume bwabo kyakuuba mba Anweba mwakonsha kumwesa ngikazhi wa mu Africa biji Mwinakilishitu mwine. Kiswishai kye, Nkambo. Pano lekai byonse byubiwe monka mwaila kyaswa muchima Wenu.

³⁴ Peshai yuwe kafunga, Mulongo Neville. Twalomba, Nkambo, amba Anweba musakumulenga kwikala kafunga wajitanga, byonka byo mwajinga Anweba bimye bya kunyuma. Kabiji

kechi twakonsha kulubako wanji mutemwe ne, mukazhi wanji muheche ao wakolwa bingi. Mulwany wakonsha kutemwa kunsha Mulongo Neville na joja jibumba ja baana, babula inabo, bino twaimana ne kubika, konka kulwitabilo, Mashi akwa Yesu Kilishitu pakachi ka mulwany ne nyenga yetu. Lekai Mupashi Wenu, Nkambo, ekale mukatampe pe aye, byo twayuka mba banabakazhi bonse batongwelwa kwenda mu kikye kipachiko, kya mfishi ya ino nkulo, bino twalomba mba Anweba mu kekala nanji. Peshai baabo baana babacheche. Aye ukekala na lubazhibazhi pa kino kimye, kabiji wamoyo, bino lekai Mupashi Wazhila ekale pa kibelo kya lusa, pa bimye byonse, pa kyokya kisemi.

³⁵ Peshai bakije kya matulasiti, Mulongo Wood, ne Mulongo wetu Egan, Mulongo Roberson, kabiji ne bonse bashala, Nkambo. Bakwashi, matulasiti, kabiji ne bonse mobengijila pamo mu kipwilo, twalomba, Nkambo, amba Anweba musakwibaleka bengile kimye kyabo na buzhile ne—ne nabololoke. Peshai boobo, Nkambo, abo baingila mu bimye bya kunyuma. Kabiji twalomba mba Anweba musakutwajijila kwikala ne atweba bonse, pakuuba mba tuyukanyikwe nobe kipwilo kya kukwatakana, ne Mupashi ne butemwe bwa Nkambo. Twalomba pano mba Anweba musakwabanya Kyambo kwi atweba, monka mwaila byo tubena kukabila, byonka byo tubena kutanga mu Kyambo Kyenu kyanembwa. Mambo twaipuzha mu Jizhina ja Yesu. Amena.

³⁶ Kabiji mu milombelo, Nakulangulukanga byo twajikupeshanga nangwa kwipuzha mapesho a bakatataka . . . jibumba jetu ja matulasiti bakatataka ne bakwabotu, Amiwa naji kulangulukanga pa Mulongo wetu Fleeman ne Mulongo Deitzman ne bakwabo baikala muno, abo baingijile bulongo, kunyuma. Kabiji twasaka kusachila Lesa pa kwingila kwabo kwawama. Lekai Nkambo ekale ne abo, kwibapasha ne mu kwibakwasha. Nakeba kutanga kasa kyangye . . . Pano vulukai, bbodi wa kubikapo masawakya kabiji ne bikwabotu, kabiji ne mbung'eno ibena kwiya.

³⁷ Kabiji tuji bingi na lusekelo pa kutanwa netu, lukeelo luno . . . Kyawama, Nakonsha kwikyamba nobe bibye, muntu wajinga wawama bingi kwi amiwa, mu bimye bya kunyuma, kabiji wawama pakino kimye, mulongo wawama, Mulongo Sothmann, kufuma ku . . . ne mukazhi wanji, kufuma ku Saskatchewan, Canada, ao uji kuno bwenyi ne atweba, mu kyaalo kyetu, mwenyi; pakuuba mulumvwang'ano lwetu, mulongo watemwikwa, Mulongo Fred Sothmann waikala popa. Aye wajinga kalama wa mwingilo wami kimye kyo najinga mu Canada.

³⁸ Kabiji mukwabo mulongo wawama ao kunyuma wajinga mwina Canada, ao wajinga musulu, kabiji wakonsha kushinikisha ku ntanda amba kechi wakonsha-kupana

kukila Lesa ne. Aye ne mutemwe wANJI walengele kipamo kya bya bumali bya kushimika kifulo, nangwa mwingilo wa mubyaalo bingi, kipamo. Kabiji bangichile ku Oakland, kwajinga mbung'eno, kabiji baambile mba bajinga na mali. Bakonsha kulipilila byonse, mu kipamo kyabo.

³⁹ Mulongo Fred ne Amiwa twaesekele byo byo na mambo a mali ajinga ne Mulongo Fred, ao o Nakonsha kubula kusenda pa buke bwami ne. Nanchi pano twafukwile kwiapana ku bantu bena Canada kyakuuba mba kechi twatambwilepo bupe ne, bino kechi kyaumvwananyikile bulongo ne. Mpwijilo yajinga yawama bingi. Bino mambo akuuba mba kechi twatambwilepo bupe ne. . . Amiwa kechi nataka muchima ne nangwatu kipwilo kiji na ma aduleendi bbilyoni, obewa ukijitu na kongole, kwi Lesa, ya kutambula bya bupe. Alwe lubaji lwa bupopweshi. Kabiji mwaiba kyokyo. . . Kabiji nangwa Naikala washikwa mali ne bintu bya byo byo, Natana kuuba mba, inge muntu uji mu kilubo, wafwainwa ne obewa kuswa mba uji mu kilubo, mambo Mulongo Fred ne Amiwa kechi twikimwene bulongo ne.

⁴⁰ Kabiji, Mulongo Borders, byo Nanshile Mulongo Fred ne kwiya kwi obewa ku Oakland, Naambile mba, “Kechi mwafwainwa kwikyuba ne. Pishaimotu kilambwilo, kabiji, musango yense mo kyaikela, abwezhaitu mu kipamo kyenu akengile ku mbung'eno ikwabo kuntu kumo.”

⁴¹ Kabiji kupwila kasa kukyangye kupwa ne, Mulongo Border ne balunda nanji baishile kwi amiwa, ne kwamba mba, “Onse o twabikile mu—mu mbung'eno yonse abwela.”

⁴² Kabiji pano, moba acheche apitapo, wanengezhezhe mpwijilo mu San Jose, California, ako ko ajinga na bimo, Naketekela sikisite nangwa bipwilo sebete mu kipachiko, balwitabilo lwapusanapusana babena kwingijila pamo. Twajinga na pwijilo yawama bingi, kabiji tukabwela jibiji, Kapande. Tuji bingi na lusekelo pa kutanwa nentu, Mulongo Borders ne Mulongo Fred baikala kunyuma kokwa. Kabiji aabo banabalume ke beenyi kwi anweba bonse, bino ke balongo bawama bingi kwi amiwa mu mwingilo, mu kulwila Lwitabilo lo twaimenapo. Lesa akupeshe, mulongo. Tuji bingi na lusekelo pa kutanwa nenu lukeelo luno, mu icheche, tabbanako yakala kuno. Kechi yawama pa kwiimona ne. Bino kujipo kintu kimo papo, kyo twayuka, twayuka mba Lesa wikala mumwe, mwamona, nanchi tuji bingi na lusekelo pa kyokyo. Kabiji kuji balongo bakwabo bawama, inge Najinga na kimye kya kutongola, abo baji ne atweba leelo.

⁴³ Pano Mbena kutengelela ne kulomba mba mu moba acheche alondelapo, inge Nkambo waswa, Nakeba kuya, naumvwa kutangijilwa. . . Kyangye ku kibijika ne. Mbung'eno yalondelapo, ku Ohio, kwikala na Mulongo Sullivan, pa mpuzha yakubungakenapo, mu kimye kyaipipa. Pajitu pepi

nobe aduleendi mailoshi kuya kokwa, Naketekela, Gene, kintu kimo kiji byobya. Lukekala lwendo lwawama bingi, mu kyangye kunengezha ku kokoloka kwenu, inge Nkambo watwajijila na kwitutangijila. Muntu wawama bingi, kabiji twamusachila bingi Mulongo Sullivan, mwingilo wawama bingi. Ujitu...Aye ke meya wa muzhi. Aye wajinga meya-wapitapo, kabiji aye ke musango-wakala wa mwina Kentucky. Abyo byo byonka bya Nakonsha kwamba pe aye. Byo Namukumenye juba jikwabo mu...Bonse babiji twakomejile kokwa ku mitumba ya ku Kentucky. Aye waambile kwi amiwa mba, “Obewa ukiji na manye musingo yobe, Billy?” Pano obewa wayuka byo—byo aji Kentucky. Pano twayai tuzhikule mu...

Kechi kya kulengulula balongo bami ba ku Kentucky baji muno ne, Mulongo Jefferies, ne bakwabotu. Amiwa ne mwina Kentucky, ne amiwa, anweba mwayuka. Amiwa nsakwimubula kintu kimo kyo tuji nakyo. Atweba kechi twi bena Kentucky ne, nangwa kechi twi bena America ne. Atweba twi bakang’enda ne benyi. Atweba tubena kukeba Muzhi ukeya.

⁴⁴ Pano pa kutanga, twayai tutange kufuma mu Buuku wa Kulupuka, mu mamineti achechetu. Nasaka kutanga kufuma mu kyapitala kyabu 23, kabiji ne veeleshi wabu 20 kufika ku wabu 23, kunungakanyatu. Kabiji Nakeba kusenda mutwe lukeelo luno, uji nobe bibye, uji bibye, nangwa byonkabyo: *Bupokolweshi Bwapwijijika*. Kabiji Amiwa kechi nsakutaya kimye kyabaya, kwamba ne, pano kimye kyo Mbena kupembelela anweba kuzhikula mu Buuku wenu ne kyapitala.

Talai, Amiwa kemutumina Malaika kulutwe yenu, mu kwimulama mu jishinda, ne kwimuleta kuntu ko Nanengezha.

Mumuteshe muchima,...ne kumvwa jiwi janji, kumusatukila ne; mambo kechi ukemulekela mizhilulwila yenu ne: mambo jizhina jami jiji mwi aye.

Amiwa naketekela mba kipwilo kyayuka Awe Malaika wajinga ye ng’anyi. “Jizhina Jami jiji mwi Aye.”

Kabiji inge anweba kine mukankokela jiwi janji, ne kuuba byonse byo Nemwambila; nanchi Amiwa nkekala mulwanyi wa balwanyi benu, ne wakwimena aba bemwimena.

Mambo Malaika wami ukemutangijila, ne kwimuleta...kuji bena Amoli,... bena Hiti,... bena Pelizi,... bena Kenana,... bena Hivi, ne... bena Yebusi: kabiji ne Amiwa nkebachibako.

⁴⁵ Lekai Nkambo apeshe Kyambo Kyanji byo tubena kwamba pa mamineti acheche, inge mwalomba. Amiwa nalangulukilenga pa yuwe mutwe, wa: *Bupokolweshi Bwapwijijika*.

Akyo Kipwilo kyaikala mu—mu bucheche. Kimye kyonse byo kikekala, mu bamembala, posotu Yesu waiya. Bino Kibena kwikala mu mashuko Akyo apana-Lesa. Inge twayukatu, akye ke Kipwilo kya Lesa mumi; kechi Branham Tabernacle ne, pakuuba Branham Tabernacle ke lubaji Lwakyo. Kuji akwabo ayewa musango matabbanako mwaya kyaalo.

⁴⁶ Mulongo Snelling, bufuku buno, uji na lubatizhilo lwa mu meema. Najikulubako Mulongo Curtis wajikumbula kubijika mba, nangwa wambujile keesha, amba baji nalo. Aye uji na lubatizhilo lwa mu meema. Kabiji inge umo muno ukyangye kubatizhiwa, ukyange, kika, Mulongo Snelling wakonsha kwikala na lusekelo kuuba kyokyo, bufuku buno. Ao ke Buzhile Tabbanako ku Utica. Kabiji Mulongo Junior Jackson, ku New Albany. Kabiji kuji bipwilo byavula byayewo musango mu kyaalo kyonse. Bino atweba bonse tuji na bumi, kyamweka nobe, tuji ku lubaji lwashindwa, pakatampe nangwa pacheche.

⁴⁷ Najikumvwa Mulongo Neville wajikubijika lukeelo luno, kunyuma kokwa, amba kyaiya ku milanguluko yami, mba kyamweka nobe bantu babena kufuma ku bupokolweshi. Kyamweka nobe ke kintu kimo, kya kuuba mba, bantu be kimona, nanchi babena kwikishijikilatu ku lubaji lumo, “Oo, kyawama, Lesa wakonsha kwikyuba.” Bino ayo kechi yo ngubilo ne.

⁴⁸ Bino, Mosesa, byo aichilwe kwi Lesa, wajinga wapwijijika, ngauzhi wapwijijika.

Inge Lesa watuma muntu umo amba obepo kintu kimo, Aye umunengezha na byonse byo akonsha kukabila. Inge Lesa waita muntu kwikala musapwishi, Aye ubikamo kintu kimo mwi aye kya kusapwila nakyo. Inge Aye wamwita mba ekale mufunjishi, Aye ubikamo kintu kimo mwi aye kya kufunjisha nakyo. Inge Aye wamwita mba ekale ngauzhi, Aye ubikamo kintu kimo mwi aye, kya kumona bimwesho ne kwikala ngauzhi. Lesa kimye kyonse umunengazha muntu Wanji kwikala wafikilamo.

Kabiji abyo Aye byo aubile byo Atumine Mosesa mu Ijipita. Aye wamukomeshe mu jishinda jimo. Kabiji Aye wamufunjishe mujishinda ja musango umo, ne Kumubumba, ne kumulemga, kabiji ne kumubika mu musango wanji. Panyuma Yakumulaya Abulahama, myaka ma aduleendi kunyuma, amba Aye ukapokolola bantu, nanchi Aye—Aye wajinga na milanguluko yakuuba mba Aye ukamulenga Mosesa mu musango yenka Mosesa ye ajingamo. Mosesa wajinga ngauzhi wapwijijika. Kabiji pano, byo ajinga ngauzhi wapwijijika, nanchi . . .

⁴⁹ Kijitu pamo nobe obewa, inge wi Mwinakilishitu, Lesa kechi ulenga Benakilishitu bakichika ne. Lesa ulenga Benakilishitu bapwijijika. Lesa kechi ulenga basapwishi bakichika ne, bino nangwa byonkabyo musapwishi wakonsha kwikala wa kichika.

Kabiji Lesa ulenga baana Banji Benakilishitu, bino bimye bimo bekala Benakilishitu bakichika. Bino kechi nkebelo yakwa Lesa pakuuba mba bekale muyewa musango ne. Ke mashinda abo bene apusanako na mutanchi wa Lesa wa bumi bwabo, kabiji akyo kyokibalengela kwikala musango ye bajimo. Lesa kechi wibakeba mba bekale Benakilishitu bakichika ne, nangwa basapwishi bakichika ne, kunekenya bintu kulubaji lukwabo, nangwa . . . Aye wibakeba mba bemanetu pakachi.

⁵⁰ Pano, Mosesa, Lesa wamulengele kwikala ngauzhi wapwijiika, pakuuba mba kwikale bupokolweshi bwapwijiika. Kabiji Mosesa wipaine yensetu mu maboko akwa Lesa. Ao oene mambo kyo kyamulengejile kwikala byo ajinga. Aye wajinga wapwijiika bingi mwi Lesa poso Lesa wamuketekela.

⁵¹ Nakumya, lukeelo luno, nobe Benakilishitu, kana twipana ku kyaswa muchima wetu atweba bene, kabiji twipana atweba bene kupwijiika kwi Lesa, poso Lesa wituketekela pakyokya kifulo kyo etubikapo Aye. Nakumya, lukeelo luno, amiwa mwine, inge Nakonsha kwipana yense kwi Lesa poso Lesa wakonsha kuketekela amiwa, wakonsha kuketekela Mulongo Neville, wakonsha kuketekela tulasiti bboni wetu, kije kya bakwashi betu, nangwa ba membala ba kipwilo kyetu. Atweba bonse tuji na kifulo, kabiji tuji na mwingilo.

⁵² Aye wamwingilo uji na kifulo kya mwingilo, wa kwimana ne kusapwila byafyamika bya bunoshi bwa Kilishitu, kwakubula kunekenya bintu ne, inge waitwa kwikala musapwishi. Aye kechi wakonsha kupulusha kintu kimo kya muntu umo ne, inge waitwa kwikala musapwishi.

⁵³ Kabiji membela wa kipwilo, aye waitwa kwikala membala wajije jibumba jimo, kechi wakonsha kunekenya bintu. Inge kipwilo kyaketekela mba kechi twakonsha kuteya ngyuka ne, nanchi awa membala kechi wakonsha kukwata ku makachi a ngyuka ne. Atweba kechi twaketekela mu kutoma ne, aye wafwainwa kupwijiika kufumyako mutwe wanji ku kutoma. Inge kechi twaketekela mu kuteya ngyuka ne, nangwa kupepa, membela wa kino kipwilo kechi wakonsha kukwata ku kyokyo kintu ne. Lesa upana bupokolweshi bwapwijiika. Inge atweba . . .

Aye ukeyyuba inge twakonsha kwipana kyapwijiika atweba bene kwi Aye. Inge twakonsha kwipana kyapwijiika atweba bene mu kuboko Kwanji, nanchi Lesa wakonsha kwikala mwi atweba. Kilishitu, Luketekelo lwa Lukumo, Aye wakonsha kwimwisha Ayemwine mwi atweba inge atweba bene twafwainwa kufuma mu jishinda. Nanchi milanguluko yetu ke milanguluko Yanji. Mwakonsha kulanguluka mba Kilishitu kupepa fwaka? Mwakonsha kulanguluka Kilishitu kutoma, nangwa kuteya ngyuka? Nanchi umvwe mupashi wenu waikala lubaji lwa Mupashi Wanji, Aye umukeba mba ekale

pa byakwisolola byobe. Pakuuba waswisha diabola waiya na ku nkushinda. Kabiji kimye kyonse, mu muchima obe, mwine mukachi, obewa wayuka mba watamisha pa kuuba byobyoy bintu.

Kabiji umvwe umo membala wakonsha kwamba byatama pa mukwabo membala, mwayuka mba akyo kyatama. Anweba mwakambizhiwa kwilombelela anweba bene na bene, kechi mwiambile byatama umo pa mukwabo ne, kana umo kutemwa mukwabo. Kabiji inge muntu umo uji panshi, twayai tumwimanyepo, mukwashai. Pano, akyo kitulenga atweba kwikala ke—ke—ke jibumba ja baitabila bakwatakana pamo. Pano, inge twabula kukokela kyokyo, nanchi kechi tukokela Lesa ne kabiji twamufichisha Lesa pa muchima. Kabiji onkao mambo, kipwilo kyetu, bantu betu kechi bakonsha kuya kulutwe ne, kipwilo kechi kyakonsha kutwajijila ne, ke mambo akuuba mba kechi twakwatakana pamo. Nobe byaambile Yesu mba, “Tumushiinshi tucheche twimanya mushiishi yense.”

⁵⁴ Pano, inge kinje kya kipwilo, nangwa nobe ba—bakwasho, bafwainwa kwiya ne kwamba mba atweba twafwainwa... kasa balanguluka mba twafwainwa kushimika tabbanako wakatataka. Inge akwa ko kuvota kwa bakwasho, kabiji matulasiti baipuzhiwa bino inge kechi baji na mali akwikyubila ne, nanchi baji na mutanchi wakushimika nobe byotuji atweba pakino kimye. Kabiji pano jibumba jonse jatolako lubaji, byo twafwainwa kwikala, kipwilo kyonse kyaikala kiyiimena. Nanchi inge kipwilo kyasalapo tabbanako yakatataka, nanchi atweba bonse twafwainwa kwingijila pamo mu kushimika yoya tabbanako yakatataka.

⁵⁵ Kwamba kishika, amiwa mwine, byo baambile pa tabbanako wakatataka, kwi amiwa, Najinga wakana yewa mulanguluko. Abyo ibyo. Naambile mba, “Atweba kechi tubena kukeba kwikala na tabbanako wakatataka ne. Amiwa kapepo kafumapo katataka, nobe Nkambo... inge byobyaya byo amweshwa Aye byafwainwa kufikizhiwa. Kika kyo tubena kukeba na tabbanako wakatataka? Atweba kechi tuji na mali ne.”

⁵⁶ Nanchi Nabwelele panshi ne kumvwa ng’umvwino ya kipwilo, amba kipwilo, mu kuvula, kyamwekele nobe bekikeba kikye. Pano Amiwa naubileka? Amiwa nalekele milanguluko yami ne kutwela mu milanguluko ya kipwilo. Kine, twayai twikyube. Inge... Ajo jo jishinda jo tutaillamo bubale, ajo jo jishinda byo kyaubiwe mu kimye kya mu Baibolo, jishinda ja votejilemo kipwilo. Akwa—akwa kwiyiimena pa buke, mabumba a bantu, beya pamo. Mu kukwatakana pamo muji bulume. Nanchi, onkao mambo, Naambile mba, “Kinetu, inge ajo jo jishinda kipwilo jo bakebelamo, inge akyo Lesa kyo abena kukeba, Aye uji na luusa lwabaya lwa kusala kwa jibumba jonse ja bantu kukila Aye lo aji nalo kwi amiwa, mambo Amiwa kechi njipo na kimwesho kya kwamba mba kechi byo

kyafwainwa kwikala ne.” Nanchi tutaya mu kipwilo, ne kwenda na kipwilo. Kabiji Amiwa nji kunyuma yakyo, na kuuba byonse byo Nakonsha, mwamona, pa kukwasha kipwilo.

⁵⁷ Ayo yafwainwa kwikala nkebelo ya Mwinakilishitu yense kabiji ne muntu yense uji mu kipwilo, ke kukwatakana atweba bene kabiji ne kwikala pamo. Kyonse kyasala kipwilo, akyo kyo twafwainwa kwimenapo. Nanchi kwaamba, nobe kyakumwenako, abo...bakeba kupipula kintu kimo mu kipwilo. Kyawama, nanchi, inge matulasiti, aye...muntu mukwabo ukeba, bakwashi, bakeba kupipula kintu kimo, akya kiletwa ku kipwilo, pano ke kipwilo pamo. Kabiji inge wetu— inge wetu mulanguluko wamweka nobe wapusanako pacheche na byaamba kipwilo kyonse, twayai tuleke mulanguluko wetu, mambo jo jonka jishinda jo twakonsha kwikelamo bakwatakana. Kabiji inge kino kipwilo kyonsha kutwajijilatu nakuya byonka byo kibena kuya pakino kimye, Lesa ukooba... Kechi byakubala ne, byo akooba Aye, inge mwakonsha kwikalatu pamo. Twafwainwa kukwatakana pamo. Abyo byo tukeba mba kikale, nanchi kwikala bapwijiika umu ku mukwabo, kabiji nanchi waikala wapwijiika mu kuboko kwa kwa Lesa.

⁵⁸ Nanchi twafwainwa kwikala na muntu ye twaketekela mba usapwila Kyambo kya Lesa. Inge muntu wabula kwikyuba, nanchi kebai muntu umu wakonsha kwikyuba. Ajo jo jishinda jo twafwainwa kwikelamo. Inge kije kya matulasiti kechi bakonsha kwimana na kintu kiji bulongo ne, nanchi ke mwingilo wenu wakusala muntu ao ukemena pa kintu kyaoloka. Kabiji umvwe mwikyuba, imanai kulubaji lwakyo. Kijitu kwi anweba. Imenaitu pa kyokyo. Kabiji, bonse pamo, twaimenatu pa Kintu kimo, awo ye Lesa.

⁵⁹ Inge membala walenga kilubo, kechi mwafwainwa kumukana ne. Mukwashai. Mwimanyai. Iyai pamo, umvwang’anai umu ne mukwabo. Abyo byo byaamba Kinembelo. Umvwe twalenga kilubo, twayai tuye kwi Lesa. Kasa tukyangye kuya kwi Lesa ne, twafwainwa kuya ku muntu ye twakozha.

⁶⁰ Nafwayijilwe kuuba kyokyo. Kabiji Nayuka mba Naubile kyatama. Amiwa nabepele, nalengejile mukazhami kubepa bubela. Naketekela Amiwa ne mubuulapo pa kikyeye, kuno ku kipwilo. Kyajinga moba acheche, kechi papita myaka yavula ne, kyajinga pepi nobe milungu sikisi yapita. Bang’ambi bampezhezhe, pa kukwe kupeswapeswa, poso byo Nabujile kuyuka kwepi ko Najinga. Ponaile ku nzubo kufuma ku ofweshi, na kuja kajo ka mulajilo. Kabiji nambala ya foni ya muntu yavumine, kabiji Meda wayile na kukumbula yewa foni. Wabikile kuboko kwanji pe akyo, ne kwaamba mba, “Ke booba bang’ambi ne jikwabo.”

⁶¹ Naambile mba, “Amiwa kechi nakonsha kuchichika ne bufuku bukwapo ne. Mutwe wami ubena kumvwanika nobe ubena kufumako. Amiwa milanguluko yami ibena kulubang’ana, babena kunkokela kukwe, kabiji ne kukwe, ne kukwe.” Naambile mba, “Amiwa kuuba ne kikonsha ne.” Kabiji Natolokele, ne Kwamba mba, “Babuulai mba Amiwa kechi nji muno ne,” kabiji nanyemena ne kunyuma ya nzubo.

⁶² Kabiji byo Nabwelele... Meda milanguluko yanji ikala yasakamana bingi na bintu bya musango yewa. Wasambakene pa kibelo, kasa abena kujila lubaji lumo. Aye waambile mba, “Bill, bushe akya kyajinga kintu kyawama kuuba nyi?”

⁶³ Obewa wayuka byo uji. Amiwa nayuka Byonji. Naambile mba, “Kine. Amiwa kechi najinga muno pakyokya kimye ne.” Nayukile mba Lesa wazhachisha pa kiky. Naambile mba, “Amiwa kechi najinga muno pakyokya kimye ne.”

Waambile mba, “Bino wajinga monka muno byo atumine foni.”

⁶⁴ Aa mabaanga Naile na kulombelela mwaana wakolwa. Kabiji Amiwa kasa kyangye kufuma pa nzubo ne, foni wajijile ne jikwabo, kabiji Yosefwa wamucheche wanyemejile pa foni ne kwamba mba, “Taata, mubena kukeba mba amiwa ne babuule mba kechi muji muno ne?” Mwamona bubi byo butwala mungi, pakupezhako kisemi kyakonsha kwikala kya musango ka?

⁶⁵ Mutanshi Yoano, kyapitala kyabu 5, kabiji veeleshi wabu 21, waamba mba, “Inge michima yetu yabula kwituzhachisha ne, nanchi tuji na luketekelo mwi Lesa.” Pakuuba umvwe michima yetu ituzhachisha, twakonsha kwikala byepi na luketekelo mwi Lesa? Twayuka, kiklutu tuji na bubi bwabulwa kusololwa, Aye kechi wakonsha kwitumvwa ne. Akyo kyakosa, bino, kiji—kiji—kiji, kipwilo kikeba bibye bintu.

⁶⁶ Pano Natatwile kulombelela yuwe mwaana. Kabiji byo Natatwiletu kubika maboko ami pe aye, Nkambo wandengulwile ne kwamba mba, “Obewa wabuulang’ene bubela. Obewa kechi wafikilamo kulombelela yewa mwaana ne.”

⁶⁷ Nafumineko kuyewa muntu. Naambile mba, “Mwane, pembelaiko ponkapano. Njina kintu kimo kyafwainwa kololwa bulongo.”

⁶⁸ Naichile ng’ambi kabiji naile konka ku ofweshi, natwelele mukachi. Naambile mba, “Talai, mwane, Nabulang’ene bubela. Nabujile mukazhi wami kwamba bubela. Aye waambile mba Amiwa kechi najingapo ne, kabiji Nanyemejile kunyuma ya nzubo.” Kabiji Nekisolwele ne kumubuula pa kiky.

⁶⁹ Waendele kwiya na kubika maboko anji pa kipuzhi kyami. Aye waambile mba, “Mulongo Branham, Amiwa kimye kyonse ngikala na luketekelo mwi obewa, pano Nakila wakila pa kyokya

kipimo, muntu,” waambile mba, “winengezha kolola bilubo byanji.”

⁷⁰ Namubuujiile, Naambile mba, “Natatwile kulombelela mwaana, kabiji aye Nkambo wazhachishe, mu muchima wami, mambo Nayukile mba Nauba kintu k yatama.”

⁷¹ Nanchi, juba jalondejilepo, bakazhi baambile mba, “Ubena kuyapi?”

Naambile mba, “Ku lukelo lwami.”

⁷² Kabiji Naile ku lukelo lwami, kulutwe ya Charlestown, konka ko Nayanga, pa myaka yavula. Natwelele momwa, kabiji Nalombelela juba jonse, “Anweba Lesa, kechi mukandeke nkobe kintu kyayewa musango jibiji ne. Anweba mundekeleko mambo, Nkambo, mambo inge Natatula kubika maboko ami pa bantu bakolwa, na kulomba, nanchi Naumvwine kuzhatwa.” Pepi nobe fili koloko mukachi kabufuku, Nalupukile. Kuji jibwe mukatampe waikala kokwa. Kabiji Nakajijile pa joja jibwe kabiji natajilenga ku musela, na maboko ami asutulwa peulu, na kutota Nkambo. Kabiji kwajinga kwazhindama bingi kokwa. Kabiji Naambile mba, “Nkambo, inge Anweba mwakonshatu. . . Kimye kimo Anweba mwapichile kwipi kwi Mosesa, kabiji aye waambile mba kyajinga. . . byo Mwamufiile mu lukelo lwa jibwe, kabiji wamwekele nobe nyuma ya muntu.” Naambile mba, “Bushe Anweba mwakonsha kwikyuba jibiji nyi, Nkambo? Lekai ami ngyuke mba Nalekelwa mambo.” Kabiji Naambile mba, “Inge Anweba mwakonsha kukwasha kubwela mu milanguluko yami. . .” Naambile mba, “Nkambo, Amiwa kechi nakonsa bulongo ne, mu milanguluko, mambo Amiwa kechi nafunda ne.” Naambile mba, “Kabiji Amiwa—Amiwa mbena kweseka kwimwingijila Anweba. Anweba mwayuka muchima wami, kabiji Amiwa kechi. . . Amiwa kechi nafwajilwe kuuba kyokya ne. Amiwa kechi natazhizhe mukuuba kyokya ne. Mutwe waumvwanikile nobe ubena kufumako, Naikele walubazhibazhi, kabiji Nekyubile mu kakimye kachechetu apo Satana po akwachile.” Naambile mba, “Inge Anweba mwandekelako mambo, lekai na mumone Anweba, nanchi, Nkambo.”

⁷³ Lesa kwikala Mutonyi wami; konka kulubaji lwami, pa kifulo kicheche mu bipupu kwatatwile kuzhokoloka nobe Mwela, kabiji Kyafikile konka kulubaji lwa lukelo nkoka ko Najinga, kabiji kyapichile kuya mu bichi. Oo, mulongo, mutende wapitaila pa kukwatakanya wapichile pe amiwa, kabiji Najijile. Najijile. Nabijikile. Nayuka bubi bwami bwalekejiilwe. Monai, Najinga wabula kukwatakana na Lesa, Amiwa kechi najinga na bupokolweshi bwa mwaana ne.

⁷⁴ Ami. . . Kabiji juba jalondejilepo kwajinga muntu wafumine ku Chicago, awo ke muntu mukatampe, Katolika waalulukiletu, mishipeshipe ku muchima wanji yavimbiletu nobe kyupu ye

bampopa, kabiji pa kimye kyabaya baesekelenga kwi ichiba, bailenga na kuuba, kabiji kechi wibalekele bekyuba ne. Pakupezhako watainwe pa misambo ya mepuzho ne mikumbu. Aya misambo ya mikumbu ne mepuzho, twikala nayo poso twatana kyepe kyatamako. Kabiji awa muntu kechi papichile kimye kyabaya kufuma po atwelejilemo ne, poso Mupashi Wazhila wapita mu bumi bwanji kabiji wa mubuuji kintu kimo kyo aubile kimye kyo ajinga nsongwalume wa ku kitapisho mu kipwilo kya Katolika. Aye waambile mba, “Abo bo bukine. Abo bukishika bwa bukine.” Waambile mba, “Bushe mwatazha mukuuba mba akya kyajinga na mambo a amiwa nyi?”

Naambile mba, “Akyo kyo kyonka kivule kyo Nakonsha kumona mu bumi bobo.”

⁷⁵ Wabwelele na kubuula dokotala, amba, “Kijitu bulongo, pano bikai bintu pamo, tusakwikala na kutumbula.”

⁷⁶ Aye dokotala waambile mba, “Tusa kupesapesa nyingijilo ya muchima ne jikwabo.” Kabiji byo atajile mu kikye, waambile mba, “Obewa kechi ukebewa ku kutumbula ne.” Mwamona?

⁷⁷ Inge michima yetu ituzhachisha, tubena kukeba bupokolweshi bwapwijijika. Atweba kechi tukeba kwikala kichika ne, kipwilo. Tubena kukeba kwikala kipwilo kitutulu nangwa kubula kwikala kipwilo ne. Tubena kukeba kwikala Benakilishitu balumbuluka nangwa kubula kwikala Benakilishitu ne. Tubena kukeba bupokolweshi bwapwijijika kufuma ku byubilo byetu, kufuma ku bubi bwetu, kufuma ku milanguluko yetu yatama, kufuma ku ngubilo yetu yatama, kufuma ku mulekelesha wetu, kiji kyonse kyo twauba. Tubena kukeba bupokolweshi bwapwijijika, pakuuba mba umvwe bantu baiya mu kino kipwilo, na kulombelelwa, kukekalatu jibumba jicheche (kape kechi kukila pa aduleedi ne, nangwa tuu) baikala muno, bino bakatanwa bapwijijika mu maboko akwa Lesa. Kabiji umvwe twalomba, nanchi Lesa ukomvwa kufuma Mwiulu. Lesa ukeba muntu umo Ye akonsha kulama mu maboko Anji, muntu umo Ye akonsha kwamba mba, “Amiwa njimo na luketekelo. Nakonsha kutuma kikye, kalume Wami wakolwa, ku Branham Tabernacle ku Jeffersonville, kabiji ne joja jibumba ja bantu bajitu na bu umo.” Kintu kimo kikamweka.

⁷⁸ Kyawama, talai Aye kyo etubila atweba mu musango ye tujimo. Kika Aye kyo akonsha kuuba inge twajinga ba muchima umo kabiji ba kuyila mumo? Jishindatu ja kwikyubilamo, ke kukwatakana pamo kwa michima yetu na butemwe bwa balongo, kokelai ba mu maofweshi a kipwilo, kabiji ne kafunga, kabiji ne kafunga wakokela Lesa. Nanchi Lesa waingijila kupita mwi kafunga, kupichila mu kinje, kupita kuya mu kipwilo, kabiji bonse pamo ke kintu kimo kyakwatakana ku Bufumu bwa Lesa. Apo Lesa po akomvwa, inge twaikala jibumba jakwatakana.

Kechi muleke nangwa kimo kimupe kijikila ne. Kechi mwikale ba kwakamwa pa kintu nangwa kimo ne.

⁷⁹ Bino, awo ye musango wa muntu Lesa ye atongwejile jimo kwangata ntanda. Mosesa wajinga wapwijijika, aye wajinga muntu ubula kunekenya bintu. Inge kwajingatu byalupata ne bintu byakisangajimbwe, kabiji ne bikwabotu, aye kechi wakonsha kunekenya bintu ne. Abyo pano Lesa byo abena kwitukebela.

⁸⁰ Felo wakebelenga kuswang'ana, waambile mba, "Mosesa, anweba bonse mwakonsha kuya, kabiji, bino, mushe baana benu kunyuma, nangwa mushe ba bang'ombe benu kunyuma kuno."

⁸¹ Ajo jo jishinda diabola jo akebelamo Mwinakilishitu kwiya. "Kikekalatu bulongo kwi anweba kutwela mu kipwilo, bino kechi wakonsha kumulekela mambo Jones ne. Kyakonsha kwikalatu bulongo inge mwakonsha kuleta wenu... inge wakonsha kuya... Obewa kechi wafwainwa kuleka kupepa fwaka ne, kutoma koobe, bubela boobe, kwiiba koobe, kukeba bilubo mu bakwenu, ne kuyebeka. Anweba kechi mwafwainwa kuleka kyokyo ne. Anweba inungaikotu kukwatakana na kipwilo."

⁸² Bino Mosesa kechi wajinga wakunekenya bintu ne. Aye wakebelenga bupokolweshi bwapwijijika. Aye waambile mba, "Atweba kechi tukashapo mukono umo lunyuma ne. Atweba tukasenda bintu byonse byo tuji nabyo, byo tukaya na kupopwela Yehoba."

⁸³ Abyo kipwilo byo kyafwainwa kwikala. "Atweba tukekala na bololoke. Atweba tukekala na buzhile. Atweba tukekala na Mupashi Wazhila. Atweba tukekala jibumba jakwatakana umvwe twaya ku kitapisho. Atweba tukekala kabungwe kakinekine. Atweba kechi tukashako kintu kimo lunyuma ne. Atweba tukekala na bintu byonse. Kechi kukekalapo mukono umo ukashala lunyuma ne." Mwayukatu, kabiji bantu bakonsha kulomba mujishinda ja kuuba mba diabola wakonsha kushindwa.

⁸⁴ Ajo jo jishinda Mosesa ne jibumba janji byo baubile. Abo bafikile kookwa ne kumvwetwa na mashi. Mwamona, poso byo bamvwetelwe na mashi, kechi kwajinga bupokolweshi bwapwijijika ne. Mosesa, ayemwine, wajinga wakwatakana na Lesa, pakuuba Isalela kechi wajinga byobyo ne. Amwa mwakijinga bubi. Kabiji bamunyinyichilenga Mosesa, kabiji baambile mba, "Kika, kika kyo ubila kikye? Obewa waleta lukatazho lwabaya pe atweba." Mambo, Felo wavuzhizhe mambilikisi abo, kabiji ne bikwabotu. Awa wajinga Mosesa; aye wajinga wapwijijika mu maboko akwa Lesa, wapokolwelwe kupwijijika kufuma ku bukafunga-mikoko, na kutangijila mikoko yakwa Lesa. Aye wapokolwelwe kupwijijika, ayemwine.

Bino bantu kechi bapokolwelwe ne, mambo mwakijinga kunyinyita mukachi kabo.

⁸⁵ Bufuku bumo Lesa byo atongwele amba mwanamukoko wafwainwa kwipaiwa, kipasha kya Kilishitu, kabiji ne mashi abikilwe na aisopi, ayo, ke nsonotu (itanwa kimye kyonse, kwikepesha), ne kwiashinga pa jipulanga ja kibelo ne pa mashiki, apo Isalela po aikele wapwijijika kupokololwa, kwakubula nangwa mukono umo wa kushala kunyuma ne. Byonse bya kulubaji lwabo byapokolwelwe. Bisemi byabo, batemwe baabo, kabiji ne bintu byonse byapokolwelwe kupwijijika byo bamvwetelwe mushi ya mashi.

⁸⁶ Apo ipo kipwilo po kikapokololwa kupwijijika, kimye bintu byonse po bikamvwetwa panshi ya Mashi. Umvwe bubo boobe bwamvwetwa panshi ya Mashi, kimye kupepa koobe, kimye kyakuteya ngyuka, kimye kyakubepa bubela, kimye kyakwiba koobe, kimye kyabubela boobe, kimye bintu byonse po bikamvwetwa panshi ya Mashi, nanchi popo kukekala bupokolweshi bwapwijijika. Walubakanya muntu umo, kyolole bulongo. Obewa kechi wakonsha kuleta kyokyo panshi ya Mashi ne, kechi akekala ne. Obewa kechi wakonsha kwialeta ne. Kintu kimo kechi kikakuswisha kwikyuba ne. Umvwe bu muntu boobe bwamvwetwa kupwijijika, bonsetu bwaletwa mushi ya Mashi, kukekala bupokolweshi bwapwijijika; nanchi obewa ukekala na kukasuluka ko wabula kuyukapo kala ne. Umvwe bintu byonse bya mvwetwa panshi ya Mashi, byaletwa munkukokela Bufumu bwa Lesa, apo ipo pakekala bupokolweshi bwapwijijika.

⁸⁷ Yesu wajinga wapwijijika, bumuntu bwapwijijika. Aye wakonsheshe kujila nobe muntu. Wakonsheshe kuja nobe muntu. Aye wakonsheshe kukoka nobe muntu. Aye wajinga wapwijijika, bumuntu bwapwijijika, mu bumuntu Bwanji. Kabiji mu Mupashi Wanji, Wajinga wapwijijika, Lesa wapwijijika, nanchi Aye walengele mubiji Wanji kwikala wakokela Mupashi wajinga mwi Aye. Mwamona, Aye waesekelwe mu misango yonse nobe byotuji. Aye wajinga muntu, kechi Malaika ne. Aye wajinga muntu. Aye wajinga na byakubila ne meseko, kijitu pamo nobe byotuba. Aye Baibolo waamba mba Aye byo aubile. Aye wajinga muntu, kechi Malaika uji peulu ya meseko ne. Bahebelu 1 waamba, mba, "Aye wajinga..." Bahebelu 1:4 waamba mba, "Aye walengelwe munshi ya Bamalaika." Aye wajinga muntu, muntu wapwijijika; kyakuuba mba Lesa watolele bumuntu bwapwijijika, mu kuleta bupokolweshi bwapwijijika, kabiji Aye wa Muyuzhizhe na Mupashi Wanji. Aye Mupashi Wazhila wajinga mwi Aye, kwakubula kipimo ne. Kabiji Aye waesekelwe nobe byonka byo twajinga. Kabiji Aye wajinga Lesa wapwijijika. Aye wikishinikishe byo Asangwile bafu, byo Azhindamikile bilengwa nalesa, pota ya tulunga ne bipupu bikatampe. Byo Aambile ku bichi, ne bikwabotu, byamukokejile Aye. Aye

wajinga Lesa, mukachi kanji. Kabiji Aye wafwaijilwe kwikala muntu, mambo Aye wajinga muntu, bino Aye yesentu kabiji wapwijijika kwipana Ayemwine (nobe muntu) mu maboko akwa Lesa, mu kwingijila Lesa.

⁸⁸ Kabiji Aye ye kyakumwenako kyetu. Atweba twi banabalume ne banabakazhi. Kabiji atweba twi Benakilishitu. Inge Aye kyo kya kumwenako kyetu, twayai twipane kupwijijika atweba bene mu maboko a Mupashi Wazhila, pakuuba mba twikale bangikazhi ba mu Bufumu bwa Lesa.

⁸⁹ Aye wajinga muntu wapwijijika; Aye wajinga Lesa wapwijijika. Bino Aye wapaine bibese Byanji bya kumubiji ku Byanji. . . kabiji ne bibese Byanji bya ku mubiji, kabiji ne kulanguluka Kwanji Mwine, kabiji ne nyingijilo Yanji Mwine, ne byakusaka Byanji Mwine, kabiji, “Amiwa ngubatu byonka bitoksha ku muchima wa Bataata.” Aboyo byo byo kiji. Wipana kupwijijika kufuma ku bantu. Bang’anga baishile kwi Aye, bantu bakatampe, kabiji baambile mba, “Labbi, *kananga-ne-kananga*,” kabiji baesekele Aye kumupa bya mazhikakanwa ku byakunembeshiwa byabo ne bya madinominesheni. Bino Aye wipaine kupwijijika mambo Aye waketekejile mwi Lesa.

⁹⁰ Bushe Salamo kechi waamba mba, “Anweba mukamupana Aye, mambo Aye waikele wapwijijika kunketekela Amiwa?” Mwamona? “Amiwa kapokolola Mutemwe Wami kufuma ku bakabwa, mambo Aye waketekela mwi Amiwa.”

⁹¹ Kimye kimo umvwe twaiya kumpelo ya lwendo lwa bumi, Nekikeba kwikala ke kyami. Nayuka mba mubena kwikikeba kwikala ke kyenu. Amiwa na mukeba Aye kwamba mba, “Amiwa kamupokolola ku mibanga ya lufu, mambo aye waketekejile mwi Amiwa. Amiwa kamupokolola kufuma ku kilende, pa lukeelo lwa lusanguko, ku mupokolola kwapwijijika, kwa byonse mweo, mubiji, ne mupashi, mambo aye waketekela mwi Amiwa.”

⁹² Yonse mingilo yakwa Yesu yapwile. Bintu byonse byapwile, kwapwiwa, kupokololwa. Aye wapwishishe kupokolola wa bibazhi kufuma ku mbumba. Aye wapwishishe kupokolola mwanamukazhi wa lukatazho lwa mashi, kufuma ku lukatazho lwanji. Aye wapwishishe kupokolola ntanda kufuma ku ubi, kimye Aye kyo afwile pa juba ja mfutoyamambo. Aye wapwishishe kupokolola ku ubi bonse. Aye wapokolwele Kipwilo. Nanchi atweba kechi twafwainwa kwikala babula mashuko ne, bantu. Kechi kyafwainwa atweba kwikala bumi bwa musango washindwa ne, mambo Aye wamushijile diabola ne kwangata bonse bakatampe ne baluusa, ne kwibabika mushi ya mau lu Anji, kabiji kechi bajipo na sambu ya kukutangijila ne. Atweba twi Benakilishitu, twayuzhiwamo na Mupashi Wazhila. Atweba kechi twafwainwa ku- . . . diabola kukajikizha kwi atweba ne. Kilishitu witupokolwele atweba,

bupokolweshi bwapwijijika; witupokolwele ku byatama, witupokolwele kufuma ku bubu, witupokolwele kufuma ku byubilo, witupokolwele kufuma ku kwamba, witupokolwele kufuma ku—ku byubilo bya myendeleo, witupokolwele atweba kufuma ku misango yonse ya mulaka watama. Aye witupokolwele ne kwitubika mu maboko Anji azhila; ke kupwijijika, bupokolweshi bwapwijijika.

⁹³ Aye wapokolwele misongo yetu. Aye witupokolwele ku misongo, mambo tuji na luketekelo lwa luusa pa kyokyo. Alaluya! “Mambo Aye waashilwe na mambo amizhilulwila yetu, ku bipumo Byanji ko twabukilwe.” Aye ye Witubuka. Ao oene mambo awa kamulanda, mucheche, mwanamukazhi kilema, walaminenga mulume wafwilenga-na kaasa, aye waendeleo kuya mu kibese kya Kyeenyi kya Lesa. Aye wajinga na lwitabilo. Kabiji aye. . . Badokotala bauba byonse byo bakonsha kuuba, nanchi aye walondejile mikambizho yakwa Lesa kabiji wajinga wapokololwa kupwijijika.

⁹⁴ Banababwanga bajinga na bupokolweshi bwapwijijika, bwakine bupokolweshi bwapwijijika. Kika? Mambo bajinga bapwisha kabiji bapwijijika kuyulwamo na Mupashi Wazhila. Inge obewa, membala wa kipwilo waimuna maboko akwa kafunga, nangwa bimo. . . wajinga na bimo bicheche byakupitamo bya kutolauka, kubijika, nangwa kwamba na jimi, nangwa kintu kimo kikwabo; bino kasa ukiji na bushikwe mu muchima obe, ngubilo ingi, kwamba bubela, kupepa fwaka, lwiso lwa banabakazhi; pajipo kintu kimo kyakibula kumweka. Pajipo kintu kimo kiyatama. “Mambo aye watemwa ntanda, nangwa bintu bya muntanda, butemwe bwa Lesa kechi buji mwi aye ne.” Obewa watwalwa mungi. “Konka ku bipangwa byabo anweba komukebayukila.”

⁹⁵ Atweba bonse tubena kukeba kukwatakana pamo, na Mupashi Wazhila. Yense membala wafwainwa kukwatakana, umo na mukwabo. Butemwe bwa Lesa buji mu michima yetu kupichila mu Mupashi Wazhila. Witutokeshwa kufuma ku bumbulwa koloka bonse. Twapokololwa ku bintu bya muntanda. Yesu waambile mba, “Kukikye bantu bonse kobakayukila mba mwi baana babwanga Bami, umvwe mwaikala na butemwe, umo na mukwabo,” umvwe umo membala watemwa membala mukwabo kyakuuba mba wakonsha kufwila pe aye.

⁹⁶ Inge kintu kimo kiyatama kiyatatulwa, baji pangye, bamo banabakazhi beya na kwamba mba, “Pano, talai, mutemwe, kyakonsha kuwama kwi anweba inge mwaubile *kikye*, nangwa kuuba *kyokya*, mumvwala *kikye*, nangwa mwaubile *kyokya*, nangwa mwaubile *kikye*, kabiji ne kufuma kuoja jibumba ja booba kyongo-kyazhila,” nangwa ne bikwabotu, atweba twakwatakana bingi na Lesa!

⁹⁷ Mwaamba mba, “Kyawama, Mulongo Branham, ke lweseko

lwatama bingi.” Pakuuba Kilishitu wafwile mambo a kyokyo. Aye diabola washindwa. Tubena kukeba bupokolweshi bwapwijiika. Tubena kukeba kipwilo kyatoka ne kyabulamo biko kabiji ne kyabulamo kumvwanganamo, kabiji kya omvewa mu Mashi a Mwanamukoko, kabiji ne kuyuzhiwamo na Mupashi Wazhila, kabiji biyukilo ne bya kukumya ne bya bulume. [Kafwapo bijipo pa tepu ne—Waku.] . . .kupokolola yense kupwijiika. [Kafwapo kiji pa tepu ne].

⁹⁸ Lesa Mutemwe, Anweba kechi mutola bintu ne kana kyapokololwa kupwijiika. Anweba kuuba mwatambula kitapisho kiji na bubipisho ne. Anweba kechi mwakonsha kutambula mulombelo ne, kyakuuba mba amwa muji bubi mu bumi bwa yewa muntu. Anweba kechi mwakonsha kwikyuba ne, Nkambo. Anweba kechi mwikyubilepo mu mankulo apita kunyuma ne, kabiji Anweba kechi mwakonsha kwikyuba leelo ne. Pakuuba kitapisho kyafwainwa kwikala kyabula bubipisho. Nkambo Lesa, byo twaikala atweba bene pa kitapisho, bumi bwa bukitapisho, fumyai mwi atweba, Anweba Nkambo, bubipisho bonse bwa bubi. Amiwa napana mweo wami yense, ne mubiji wami, ne bulume bwami, ne ngovu yami, na kino kipwilo lukeelo luno, pa kitapisho. Tutokeshai na Mashi Enu, kabiji ne kwitulekelako ku bubi bonse bo twauble. Kabiji lekai Mupashi Wazhila mukatampe ekale kyabaya mwi atweba, kabiji ne Kyeenyi Kyanji kiye ne atweba kufuma ku ino tabbanako lukeelo luno, kyakuuba mba tukayuka atweba bene mba Aye witulekela mambo. Nanchi mulombelo ukekala kuuba mba, “Tulekelaiko mambo etu byonka byo tulekela betulenga mambo.” Kiswishai, Nkambo.

⁹⁹ Anweba Ikalai pepi ne atweba, tupeshai ne kwitulama poso byo tusakukumana jibiji mu kumpwila kwa mabaanga abufuku. Lekai twiye na maboko atoka ne michima yatoka to, kyakuuba mba Anweba kechi musakumana ne, mambo tubena kukeba bwapwa kabiji bupokolweshi bwapwijiika kufuma ku kintu kiji kyonse, Nkambo, pakuuba mba twilame atweba kwikala bukyeya kya pantanda; kyeya kyabikwa pa katumbatumba, kechi kyamvwetwa mu musansa ne, pakuuba ke kyeya kyabikwa pa katumbatumba, akyo kipana kyeya mu kutangijila mauulu a bantu mu jishinda jaoloka. Kiswishai kye, Taata. Twikipuzha mu Jizhina ja Yesu, kabiji ne ku lukumo Lwanji. Amena.

¹⁰⁰ Amiwa mbena kwipuzha Doko . . .Naketekela uji kunyuma kokwa, nangwa umo waba kwasho uji muno. Amba kipwilo kitange kikyeye, Doko, iyai mubike kikyeye pabbodi wakulamikapo bintu pakuuba mba kipwilo kikimone byo basakuyanga pangye. Kabiji pano Mulongo Collins, inge uji muno . . .Bushe Mulongo Collins uji muno nyi? Mupai kikyeye kikwabo.

¹⁰¹ Kabiji, kijitu bulongo, mwane, kabiji tusakumona kika . . . [Mulongo Branham watanga kyanembwa—Waku.] Ke muntu

umo ubena kukeba misambo ya kwiipuzha ne mikumbu. Akyo kimye kyonse kiswishiwa. Tuji bingi na lusekelo.

Kabiji Amiwa njina misambo ya kwiipuzha ne mikumbu. Mwamona, kintu kyakuuba ke kwita nambala yetu koko. Atweba—atweba twajinga na lukatazho lwabaya bingi pa nzubo, kipwilo kyayuka. Abo ke benyi. Kipwilo kyayuka pa kikye. Kwafwainwa kwikala kibese kicheche kyabikwa... Amiwa nsakwikibika muno mu kipwilo, ne akyo, kyabooba babena-kwiya. Mwamona, kuji bavula bingi, kyakuuba mba kechi twakonsha kwingijilapo bonse ne, monka mo basakwishilanga na nambala. Mwamona? Kabiji atweba... Inge mwakonsha kutuma pa BUTler 2-1-5-1-9, BUTler. [Nambala watelefonti wapipulwa—Waku.] Kabiji ne ba membala baji bonse bakonsha kumona uji yense ubena kukeba, Amiwa kimye kyonse ngikala walusekelo kumona bantu. Bino tuji na mutanchi wa kimye kyonse wakulondela. Kuji bamo baitwa kala, bavula, mwamona. Kabiji twaiyatu, umo umo, byo tubena kwiya. Nanchi kuji... Kyaikala kuuba mba, twaikalangatu na bintu byabula mundonda, mujishinda jiji jonse, watoloka, wakiluka, bantu bayanga ku manzubo balengeshiwa buvu ne bintutu bikwabo. Pano baji na bintu byonse mundonda. Kabiji akyo kyo tubena kweseka kwambapo pakino kimye, monai, kubika bintu byonse mundonda, kyalumbulukatu.

Kabiji Amiwa kekala na lusekelo kumona baabo batemwe, inge bakonsha kutuma pa BUTler 2-15-19 (1-5-1-9), kabiji Mr. Mercier nangwa Mr. Goad, umo, ukakumbula foni ne kwi mubuula kimye kyenu kyangolwa. Tuji na kifulo kokwa, mwabikwa byamwela, kabiji kyanengezhiwa kutambulwila bantu ne kwibalombelela. Atweba tuji na lusekelo lwa kwikyuuba.

¹⁰² Bino, ene mambo o Mbujila kwiya ku kipwilo ne, bantu balanguluka mba Amiwa nyema bantu; kechi byo kiji ne. Amiwa mbena kweseka kwi—kwikala mundonda. Mwamona? Akyo kyo Mbena kukeba kwikala, kechi kweseka kumwesa mushingi ku muntu ne. Muntu yense, muntu uji yense, kuji konse, kimye kyonse, mwamona; mushobo, lufunjisho lwa kipwilo, kechi kijipo na kyakuuba nakyo ne. Atweba twiya konka kuno na kukumanya bantu. Kabiji umvwe baji na kyakukabila, twikalatu ne Lesa poso kyaubiwa. Inge bakeba kuyuka kijin kyonse pa byambung'eno, mambo, tumona kuuba mba twaingijilapo ne kwikibiika pa failo. Akwa ke kutangijilatu kwa Mupashi Wazhila. Kabiji akyo... Aja jishinda, Nalanguluka mba jijitu, jingila ku uji yense mujishindatu jimo. Onkao mambo, kechi kujipo munema wa muntu ne, kafwako munema ne.

¹⁰³ Kwajingapo bantu bajikwiya na kulombelelwa, lukeelo luno, aba bakolwa kabiji bakukebanga kulombelelwa? Kijitu bulongo. Kafwako.

Pano twayai twimbe lwimbo wawama pa . . . wa bupopweshi. Twafwainwa kwimba ka lukeelo luno? “Kika kyakonsha kufumyapo bubi bwami?” Wikiyuka, Teddy? “Kafwako kanatu Mashi akwa Yesu.” Kika . . .

[Nyenga waamba kwi Mulongo Branham—Waku.] Kijitu bulongo, mwane. Mubena kukeba kumulombelela ponka pano?

Amiwa nsakulombelela yewa inetu. Bikai maboko pa yuwe mwanamukazhi papo. Mwakonsha kukunyika mutwe wenu pamo ne amiwa, pano, bitende bitende.

¹⁰⁴ Lesa Mutemwe, paji inetu ao wakolwa bingi. Nyenga yetu wapana mubiji wanji, kufika pa kufumya kaasa pa bakwabo, ne kwimana pakachi, mambo abakwabo. Bino Anweba mupokololai kufuma ku kyokyo, Nkambo, moobatu acheche apitapo, kimye abye bintu po byayukanyikilwe. Mulekaitu ekitane, aye mwine, ipo, Nkambo, aye po akayuka mba kyafuma kwi Anweba. Amiwa nateteka maboko ami pe aye, kabiji naipuzha lusa lwa yewa mwanamukazhi mukwabo ye aimenako. Lekai lusa lwa Lesa, Bulume bwa Mupashi Wazhila . . . Umvwe mujipo kintu kimo kyatama mu michima yetu, Nkambo, kisololai kwi atweba, patanshi, apa bino tusa kuya, na kwikyolola. Apo ipo po tukayuka mba twatalwa bulongo kwi Lesa, mba tuji na mutende na Lesa, atweba tutambula kyo twaipuzha, mambo kechi tuji na luzhachisho ne. Kiswishai kye, Nkambo. Mu Jizhina ja Yesu Nalomba. Amena.

Kijitu bulongo.

Kika kyakonsha kungovwa bubi bwami?
Kanutu Mashi akwa Yesu;
Kika kyakonsha nkupa bututulu jibiji?
Kanutu Mashi akwa Yesu.

Oo, buwame bwa pichilo
Ao atokesha too;
Kafwako nsulo ikwabo yo Nayuka ne,
Kanutu Mashi akwa Yesu.

¹⁰⁵ Baanga baumvwa mba bubi bwenu bonse baji mushi ya Mashi? Twayai tumwimbe na maboko etu asutulwa peulu.

Kika kyakonsha kungovwa bubi bwami?
Kanutu Mashi akwa Yesu;
Kika kyakonsha nkupa bututulu jibiji?
Kanutu Mashi akwa Yesu.

Pano byo tubena kuponya maboko etu, twayai twiyimune maboko.

Wawama ke . . .

Abyo ibyo, kuzhokoloka.

. . . atokesha too;


Kafwako nsulo ikwabo yo Nayuka ne,
Kanutu Mashi akwa Yesu.

Mwamutemwa Aye nyi? Amena.

Oo, byo Namutemwa Yesu,
Oo, byo Namutemwa Yesu,

Pano ikalai nanji, pano. Muntu yense akwachijiletu kwi
Lesa.

Byo Namutemwa Yesu,
Mambo Ye mutanshi watenenwe.

Amiwa kechi kamuleka . . . 

59-0712 Bupokolweshi Bwapwijjika
Branham Tabernacle
Jeffersonville, Indiana U.S.A.

KAONDE

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org